

清容居士集

開化圖書館

Kaohua library

開化圖書館

Kaishua library

開化圖書館

Kaichua library

開化圖書館

Kaishua library

清容居士集卷第三十二

行狀

翰林學士嘉議大夫知制誥同

脩國史趙公行狀

曾祖伯洙宋朝請大夫知南外

宗正事贈金紫光祿大夫

祖師雍宋朝議大夫直寶章閣

考希聖宋宣教郎史館校勘

公諱與熏字晦叔宋燕懿王德昭九世孫  
高祖子英宗正少卿避地南徙紹興間為

台州黃巖丞家于縣之西橋至其子孫遺  
育蕃衍故今號西橋趙氏宗正有孫師淵  
字幾道官至太常丞為朱文公高第文公  
述通鑑綱目條分例舉整齊芟奪迄于成  
書皆太常所定其言理學蘊奧心受耳屬  
精析該邃非若語錄所傳剽臆謬妄東南  
後進咸尊太常與黃榦氏並於公為伯祖  
公少美儀觀音吐清徹讀經史大義必本  
家訓弱冠以易入宗學登咸淳辛未進士  
第用積舍法教授鄂州鄂為楚上流歲備

武不憚公視邊將翫弛而咸淳士大夫率  
耻言邊事迺策諸生而問曰文武之用不  
可偏廢韓范二公不以言武而失文曹彬  
狄青不以清談而喪武文事武備豫然後  
立時未幾王師絕江守以城獻公自念為  
宋國族鄂先內附兵勢若破竹不可支而  
歸道已斷絕不得返遂上書丞相伯顏公  
言宋權臣賈某柄國十有五年脅威罔主  
棄背信好事一至爾今得冀如藩臣歲奉  
貢幣願緩師以行成焉書未報而錢塘已

下實至元十三年也公知南北已混復上  
書丐返田里會大臣有竒公狀貌告于  
世祖皇帝十四年遣使上驛來京師幅  
巾深衣見於上京

天子清問溫渥首詢其老幼及江上事首  
尾其對復如上書所言特命給廩餼以俟  
用明年奏言江南郡縣戶口繁夥當以簡  
易治近歲有司急切興利殊失安輯新定  
之意臣生長江南悉習利害因條類為十  
六事以進大較以擇守令釋征歛厚風俗



為急而末復以存活趙宗為請十六年入  
翰林為待制陞直學士復兼集賢又三年  
遷侍講學士預纂實錄加太中大夫於是  
侍講十四年矣累疏乞致事歸里雖未得  
旨而不入翰林者幾二年久之拜翰林學  
士自鄂之來京師凡二十有七載由里  
居而之鄂也適三十年每恨乖隔愈久冀  
一得請以終老丘隴常忽忽不樂秋風倚  
楹懷悲故鄉擁衾障袂聲出金石非復以  
宦達為可戀惜而志迄不遂抱疾暮歲以

卒大德七年正月二十有二日也年六十  
有二積官至嘉議大夫公之為侍講也言  
江以南括責營聚皆大臣與其黨類私植  
貨累鉅萬願寬今年田租以緩赤子宋世  
陵寢毀掘及移徙故宗室大姓皆非初  
詔本旨乞正其私擅之罪

天子以為然又言乃者庚寅歲大霧四起  
越翼日癸巳夜地震地為臣道臣強則震  
至正月甲辰西域老虎就擒虎於象為免  
為金其著尤異咎在姦臣簸權今已執咎

而宸斷未果願蚤正天誅以應變異  
上意若微忤而終不以罪由是居家待罪  
閱三月大司徒公自  
上京俾燕只干學  
士諭以復職後平章政事不灰木復為公  
奏逋負歲積不能自養

上曰得非指桑哥為庸者宜令有司計逋  
以償歲別給帛粟餘勿為例人益知  
世祖皇帝神武沉斷非真忤公公天性踈  
達與人交緩急高下盡力傾引弗避不為  
刻峭自高亦不復計得失成就故始爭趨

幕而間輒掉去訖無毫髮恨意傾觴煮茗  
費盡即止危坐清論一不以靡密缺乏廢  
其雅道歲時奠薦雖甚匱畜猶豐絜盡力  
如舊禮自宗正四世而下皆請于朝而  
復其役族屬男女以及鄉里之俘虜而北  
來者悉贖以歸凡十一人有張生貨藥西  
關一日過之張死已數月矣亟歸視藥券  
盡酬所負其家人不知也遂具以告而歸  
之一士人伺公錫賜時謾言當買田毫宿  
間計資與之歲久不至後亦不問其受欺

類如此同列有悔公為方拙暨死之日朝  
野咸曰善士已矣各賻奠哭弔終其歛事  
而同列亦悔昔日所悔為可愧往右丞許  
公仲平薦意道德性命之學奮自飭厲以  
文公四書為標準達官高胄皆俛首承訓  
不敢怠公時至京師首言力行致知  
近世率清曠自高言行若杓鑿不相入非  
儒先本旨許公深然之至觀其平居處身  
待人抑華養實許公雖死而昔時門人親  
聞其言者皆以為伊洛源委惟趙公為真

江寧府志卷之三十一  
五  
侶益以知太常之學為可信至公為有傳  
矣有詩文若干卷類聚藏于家初娶舒氏  
御史中丞亶之五世孫未踰年而卒歛篋  
中裝歸其婦翁不取今夫人史氏奉直大  
夫知連州一之之女生三男子長孟實以  
公居 朝廷久特官為承事郎同知瑞安  
州事孟賚温州蒙古學教授孟貫以廕入  
官孟實等欲求銘當世有道以信于後俾  
稱有述謹具歷官行事如右謹狀大德七  
年七月日從表姪具官素稱狀

推誠保德功臣開府儀同三司太  
傅上柱國追封薊國公謚忠哲梁  
公行狀

公諱德珪字伯溫姓梁氏大興路良鄉人  
八世祖德成遼末以勇力善賞雄鄉里生  
子吉不仕吉子伯溫金皇統進士官通議  
大夫同知河南府事遂贈吉安定郡伯郡  
伯孫牧牧子陟明昌進士官中奉大夫同  
知南京路都轉運司事亦贈其父安定郡  
侯郡侯有別墅金世諸名士日觴詠從之

游中奉髫年能以詞章相周旋咸器偉之  
晚歲直節善政深自植立值金亡終老於  
里生術為金承奉班祗候祗候生守信終  
隆興都轉運鹽使轉運生國禎終內藏庫  
提點是生公後以公為左丞時 朝廷特  
號中奉曰通憲先生轉運贈榮祿大夫定  
國公謚忠毅提點贈榮祿大夫安定郡公  
謚僖敏公幼歲給事

昭睿順聖皇后宮中竒其器骨俾熟國語  
通奏對年十一太府長官愛之帥其弟德



瓚同見

世祖命相者閱二兒相者曰後當貴

帝頷之遂使從東平忠獻王安童習憲令  
儀注年十四即襲父職至元十六年升中  
書左司員外郎二十三年遷右司郎中踰  
年復左司二十六年進太中大夫總管大  
都等路打捕府仍領左司是歲復右司二  
十八年參議尚書省事復遷中書二十九  
年

世祖特旨拜參知政事

成宗即位陞中書左丞大德二年拜平章  
政事公未弱冠即官官省踰三十年錢穀  
出入高下若指諸掌四方奏請率面授中  
書掾言某事當如律某當如

先帝某年所行極邊宗王急驛調發卒無  
所從具同列拱手不能語公徐言軍用有  
故實泛索非故事不可行執筆量劑退考  
故籍無少訛誤戊子歲地震北京

世祖問今歲刑部所報囚徒何煩多公對  
曰囚非犯罪特以徵索羅織無所從納

故悉為囚在獄中

上大感悟迺悉赦天下逋負京師供

給繁夥屢奏蠲復之漕運根本江南浚

治諸湖堤不宜使富民侵塞以殺水勢議

自公始選部資歷吏不敢後先一時以事

功自期者公亦與一二執政議超常格俾

自效方大德初元

成宗恭儉守成一繩祖武公亦以朝政

自任年穀豐熟四境寧謐廟堂大臣相戒

以清淨為治凡上書言利害斂口不敢發

自是希進者皆避匿後議相持既深朋聚  
比進乘事間發浸淫於疑侶之際會

上不豫遂出公湖廣安置踰年

上疾稍瘳罪一二幸臣急召公還都遂乘  
驛朝于上京

上問卿從何來公環視嗚咽不敢對

上賜酒饌命歸省其母諭以將再用至九  
月詔復入中書時公已得上氣疾與家  
人言向嘗遠謫今得再覲

上明白母子相完聚即死且不恨何敢復

有希進意遂却藥危坐謝事某日星殞西  
南有光流室中是夕薨年四十有六葬于  
宛平之樊村妻安氏今封薊國夫人柔靜  
能家子一人某女三長適納速刺僉事次  
適伯達某路都提舉幼適某同知宣徽院  
今上改元詔錄勲舊贈公推誠保德功臣  
開府儀同三司太傅上柱國追封薊國公  
謚忠哲而公祖父亦復追命為國公母夫  
人完顏氏公能承侍盡道待二弟曲致恩  
意對賓客謙不失禮自以先謀踵世科尤

重儒士詢考安定別墅為圖表章一時縉  
紳咸賦詠追美其事侍

帝左右率傾候意嚮獎拔士類至於決事  
占奏悃欵不讓而悉簡愜稱

上意死雖十餘年朝廷至今猶稱道之  
前翰林脩撰知高郵府張某次公遺事命  
桷演潤將求鴻藻以表墓道桷與張侯曩  
同在翰林見一時行事張侯以親嫌為辭  
公之弟德璋今益都總管昔為慶元判官  
時桷居鄉里得聆公言行遂不敢以草野

為辭然舊聞中原故老嘗言梁斗南文采  
風度有陶靖節晚歲志意後進爭慕企久  
知廼通憲先生也先生言行在人口不絕  
方金將亡時士族解散漸盡暨獲平定推  
原高曾名字於荒碑野塚之際皆缺軼無  
所考獨梁公八世官簿歷歷可据德源深  
長通憲守儒之效著矣至若公行事在史  
冊者不敢有私姑次其出處大致使銘述  
者有考焉延祐三年九月某日翰林待制  
承務郎兼國史院編脩官袁桷狀

翰林承旨王公請謚事狀

公諱構字肯堂世居濰州家譜云與中書  
令同系八世祖某宋世為司農卿守鄆因  
家焉故今為東平人曾祖某金進士奉訓  
大夫滄州無棣令祖某以公貴贈正奉大  
夫太常大卿考某贈昭文館大學士資德  
大夫公幼歲肄業郡學試詞賦入等杜先  
生仁傑深器之賈文正公居貞一見館以  
教其子載與來京師時太保劉文正公  
王文康公王文忠公持薦士權即辟為權



國史院編脩官丞相史公耶律公在政府  
聽公上事言論接以賓禮耶律公復戒其  
子以兄禮事焉至元二十一年授將仕郎  
命為真于時集議時政必使公預會裁酌  
之十二年丞相伯顏出師諭江南公實草  
詔是歲渡江

世祖命翰林直學士李槃與公偕行俾蒐  
擇儒藝之士明年春次杭州公見董壽公  
某曰故宋圖籍禮器具在宜收其祕書省  
天章閣翰林太常考集目錄宋史異日必

備纂遂悉輦歸于朝十四年充應奉翰林文字公辭曰少嘗受學于李先生謙今先生猶教授東平實不敢先遂以其官召李明年始受之十六年陞脩撰凡制誥撰述文康公必以命公丞相齊魯國公和禮霍孫領翰林開司徒府授府司直世祖詔大臣議道藏可焚棄者公與議完救之十九年丞相阿合馬敗齊公入相議選舉更定法皆公手定遂授吏部郎中未幾改禮部後復吏部而翰林制誥猶諉公

參詳焉二十二年遷太常少卿

上方定宗廟修禮樂而公昔從故宋所輦  
還者皆得補缺二十四年出為江北淮東  
道提刑按察副使御史大夫率公陞辭

上賜酒慰遣擊奸惠民淮民猶能言其事

二十七年除治書侍御史故相桑哥嫉公

命與故平章魯公卜忽木檢責燕南逋負

公先馳驛會計簿領迄無所迎合謂魯公

曰公近臣某復在言路相若苛責當受罪

不以累公也未幾桑哥伏罪二十八年調

選江西二十九年改翰林侍講學士三

十一年

世祖升遐

成宗嗣位分院上都制誥多公次定

徽仁裕聖皇太后知之特賜楮幣七千五

百復命撰

世祖祔廟謚冊攝司徒以導禮大德改元

纂脩

世祖實錄陞翰林學士二年參議中書省  
事右丞相引見于柳林

上問昔從何人丞相奏是和禮霍孫官屬  
真儒者昔奉 旨叅用儒生今故用之時  
上初即位勵精文治年穀屢熟海內熙洽  
公從容二相間以薦士安靜為急務後數  
年來執政希合生事將檢括增羨首以其  
策行東南公卒不肯附稱疾納祿幾一年  
七年 朝廷更政獨公無所累歸里九年  
授濟南總管禮法自持嚴而不苛凡為民  
害者悉除去丞相荅刺罕見公所申牘咸  
從之十一年太師潘陽王等奏俾乘驛造

朝拜翰林學士承旨復脩兩朝實錄

特命贈公二代公言臣本儒家遭逢四

朝先世皆潛德里士大國美謚懼無以

稱以臣所居官授之誠以為過今群臣封

謚下太常必繇翰林議官品臣首踰越將

無以服衆

今上時為皇太子嘗詢翰林老成必首姚

燧王構手以酒賜之是歲尊謚

祖宗公撰

太祖

開

睿宗皇后謚冊賜楮幣萬緡正月撰

皇后冊文攝侍中讀冊至大三年以疾薨  
公在朝廷踰四十年凡累朝憲章損  
益能悉舉源委翰林述作自為編脩時已  
預撰先賢文懿尊酒叙論咸有據依欲輯  
為臺閣舊聞而事莫遂崇拔後進雖未識  
面汲汲稱許不絕口性剛直有不善必面  
責之有文集三十卷藏于家子士熙今為  
翰林待制竊惟聖朝褒錄臣下見於今  
典謹撫其居官行事請於太史上於太常

至若居家雜儀治民遺事悉弗敢次第延  
祐三年九月日門生翰林待制承務郎兼  
國史院編脩官袁桷上

李司徒行述

代作

嗚呼我先公之亡銓時年十有三遺言懿  
範誠不盡知雖知之亦不能盡詳少鞠于  
趙氏外家外大父諱某為南京同知先夫  
人嘗泣語銓曰汝父沉靜寡言笑篤志嗜  
古卓然遵聖賢言行為矩範強之仕弗肯  
仕凝塵敗席家事靡密弗顧疾革猶執卷



矐然若有思空約彌甚間嘗曰我幼孤長  
兄樞密都事教我撫我繫汝舅之訓汝舅  
生三子長都事君從革次總判君從謙余  
叙為季生兵革中我先君每誨吾兄曰家  
世朔州罹亂離朝夕習騎射今邊宇寧謐  
諸兒宜守儒顯親母刻木吏為也都事受  
其言朝夕以詔二弟俾從學于九山李先  
生徵吾詎願不仕非其道不可也銓幼不  
能必其成後其語諸又曰大父之墓在朔  
州地遠不能至考其事則有紫陽楊先生

之誌在戒其毋忘焉不幸某歲卒年四十  
有一葬于南城柳村之原先公既卒家益  
困太夫人挈于外家化治銖粟率資以教  
銓稍長痛自感勵有以其名聞于

世祖皇帝詔習儒業入國子學師許文正  
公焉後直省闈三年出為彰德鐵冶提舉  
又十年同知歸德府事始得致養于母夫  
人元貞元年過汴梁將歸京師不幸夫  
人卒於汴卒時年五十有八奉柩歸葬于  
柳村相其地水齧如不可旁祔廼卜於西

山金河口田峪之南得合葬焉冬十有一  
月某日也元貞元年為翰林待制又三年  
轉廣平等處鐵冶提舉改工部員外郎承  
檄視屯田鴈門鴈門地近朔州銓思念吾  
大父葬朔州在鄴陽灰河西一里今六十  
年榛莽不可致有楊先生英誌在雖無能  
知吾以誠求寧卒使無知哉翼日驗誌徵  
旁近卒無有哭走于野有老叟年八十餘  
迺來曰李府君葬時吾嘗治畚鍤于灰河  
今西一里隆然者其墓也銓泣且拜得封

崇以識焉楊先生之誌曰李君大父諱彥  
宏由彥為名者十八人自彥而別為王者  
二十六人其諱玘者銓大父也我先考大  
父之幼子也都事有子曰某總判君無後  
銓由是奉都事而下皆合葬于西山而灰  
河之墓始樹楊先生之碑推大父燾後之  
德遭時隆平非若昔時之永隔歲時省墓  
則力猶可至也楊先生之誌又曰大父為  
山西西路課稅時耳目所逮纖悉必陳於  
長官有以權麴牟利即峻拒絕後患或言

郡縣始安輯宜用重典使不犯輒面折陳  
白非忠厚恤民本旨先公之誌翰林承  
旨王先生構則曰拱璧駟馬流俗所恃孳  
者先公無是心也銓無所肖似自工部改  
授朝列大夫揚州路同知臺擢爲監察御  
史四年少中大夫河北河南道肅政副使  
五年移淮東未幾嘉議大夫常州路總管  
不六月召為叅議中書省事又六月除禮  
部尚書復五月轉燕南河北道肅政廉訪  
使改昭文館大學士中奉大夫治書侍御

史

今上皇帝推賚存歿於是得贈大父資善  
大夫司農卿上護軍追封冀國公謚莊順  
祖妣王氏冀國夫人考榮祿大夫司徒上  
柱國追封冀國公謚端敏妣趙氏冀國夫  
人嗚呼銓無所肖侶承藉先德先夫人之  
訓歷歷在耳願因人朝廷光顯之寵求文  
鉅公表於墓道俾李氏子孫後有攸考謹  
再拜叙其事于右端敏公諱從益銓今為  
翰林侍講學士娶孫氏封冀郡夫人合三

房孫凡幾人長某延祐四年九月日男翰  
林侍講學士中奉大夫知制誥同脩國史  
李銓狀

資德大夫大都留守領少府監事  
兼武衛親軍都指揮使知大都屯  
田事贈推忠贊治功臣銀青榮祿  
大夫平章政事澤國公謚忠宣鄭  
公行狀

本貫澤州陽城縣澤陽鄉屯城  
里年四十七

曾祖珪不仕

祖皇故忠昌軍節度使

父鼎故鎮國上將軍湖北道宣  
慰使贈銀青榮祿大夫中書右

丞謚忠毅

公諱制宜字扶威澤州陽城縣人大父節  
度當金危亡時以智略慷慨衛拯里社興  
屯田陂池之利年不展用是生忠毅公提  
天師勦羌蜀絕襄漢竒勲冠勇功次表焯  
官譜始著公忠毅公之嫡子也方勝衣時



忠毅携見于

世祖皇帝特視偉之命從大臣習給事儀

忠毅遇寇死難

世祖震悼迺即授金符襲平陽太原之軍

而戍鄂焉公盛年受殊數益矜謹自重控

伏將士帖首無撓犯湖廣行中書治鄂戎

帥策馬進退承教令縮蹙不自給獨公爭

器重傾下鄂守缺長執政俾攝治日坐決

文武兩府郡益以理凡數歲訖不除鄂長

官十九年 詔治樓船有事於島夷江澣

地不足居船官城南有何家洲洲爽廣多  
居民中書行令遷洲屋什徹墻瓦聲涵撼  
白日交走驚泣道上公行相旁近地與洲  
無異即趣還其居洲民爭持牢醴拱謝公  
揮手曰安民吾職也何謝焉鄂多火災連  
晝夜交作或言城中隱姦利羅疑侶者急  
治火可止公言咎在火政不明火未絕而  
復誣構彼何生為遂率軍士申令約立渠  
巷俟火所未至通徹其道火是日迺止有  
盜私立部踞伏近郊日暮剽劫負擔者訛

言將入城索之不得見數男子從城外來  
促數異顧命縛之省貴人曰得無以疑詿  
誤將出之明日過城東門見一少年乘白  
馬行且色動公呼曰汝賊也汝貌良人也  
何作賊不速言當訊汝少年叩首吐實復  
信宿日所捕亦同款一郡大驚二十三年  
徵入侍中明年從駕北征願前敵效擊  
上曰鄭制宜死唯一子在宜勿使擊復請  
戰乃命從太師以行師還詔侍膳殿中  
加懷遠大將軍樞密院判官春駕如上

京院留母行公曰年少宜服勞願以偕行  
上愛而勿許二十八年超拜湖廣省叅知  
政事是時鄂大臣集括歛為竒功

上怒錄其家公入辭

上曰而父死賊難賞不及于汝今有盜臣  
貲財僅孳留貯于鄂者宜擇精善自取公  
對言某臣家入皆賊穢不可詰受之雖無  
汗然跡其由來寧無汗乎

上益竒之鄂為舊治土俗厚薄悉周知其  
隱蘇枯翦彊翕然至和

上知其能賜中金五千兩間歲具口奏臣  
向留鄂治兵臣母知臣年未更事乞臣侍  
陛下宿衛今不以卑鄙預外政府朝夕思  
念不勝任敢昧死以請復徵為內臺侍御  
史安西地歲牧馬牧人利曠遠率併入旁  
近世業民數訴理求地持軋不下命公乘  
急傳治其事覈地得三十萬頃考籍于官  
餘悉歸于民三十一年拜行樞密院副使  
院治衡州公統軍入衡下令不得入廬舍  
營部擇便地定井竈食罷發至暮整列

就次道遇兩卒言宜止頓舍休憇公立兩  
指畫訖一卒無敢宿民居道旁市井人雜  
語不知為官軍也湖南地介江廣賊負險  
煽昭賀聯絡廬陵諸屬邑大軍至即守固  
不復出歲一捕寇率害善地寇伺去復嘯  
集如故公至相院塞雜耕守戍據其出沒  
明語歸降者釋弗殺逐殲其酋長茶賊譚  
計龍匿兵器有異志立捕得之其弟昇貨  
以緩事公趣輸于軍卒正其罪  
成宗皇帝改元復別置副使一人與公同

治公謂官溢常負先置者當罷入授大都  
留守領少府監未幾兼武衛親軍都指揮  
使知大都屯田始進階資德大夫公幼熟  
內府營繕工巧供給祠祭之屬能通達緩  
急終歲事集無曠敗至大宴席刀匕樽俎  
必命公董領以重其事大德七年地震太  
原平陽公承命往視且言河東罹鉅創  
聖天子出粟幣以賑活之設一不及是負  
明詔死罪萬萬何可逭廼躬入里巷傷殘  
羸餒悉疏錄以給有市官利征商詭言某

地少災不冝費官廩征法冝如昔無所損  
公怒曰幸災困民民何罪且汝計征入何  
補縣官入言于

上復其地三年公天性慤厚

上宴大明殿獨侍立不惰命之飲再拜辭  
上察其意賜酒二壺使歸飲于家事母蘇  
氏至孝特封潞國太夫人以寵之錫賚無  
虛歲復加賜海青俾入禁園尤號為異數  
大德十年二月五日以疾薨年四十有七  
其葬在某縣某鄉自公少時已知自貴乞



名於王文忠公王見而器之遂定其名字  
忠毅以死事顯故公彌欲以忠孝勉獎通  
敏有持守其居鄂十年善政藹著至今父  
老言鄭公真清士非他人比至守官靖正  
不以喜怒害事謙抑自晦中朝士大夫則  
曰鄭公真吉士也配可烈真氏丞相字羅  
公之女子鈞今為懷遠大將軍武衛親軍  
都指揮使至大更元特贈推忠贊治功臣  
銀青榮祿大夫平章政事澤國公復下太  
常定謚曰忠宣謹具歷官行事鴻筆碩彥

得以取擇謹狀

榮祿大夫大司徒特封饒國公吳

公行述

本貫饒州安仁縣開興鄉壽櫟里

公諱克己字祥甫維吳氏遠有令緒秦伯  
以至德讓嗣逃于吳周受殷命大封同姓  
而秦伯胤系因食采吳地子爵不絕周既  
衰吳越楚爭王吳為越所僨子孫散處江  
湖間因以國氏夫差六世孫芮為秦番令

有德于番號番君漢次芮功封長沙而廟  
食番世不絕宗庶蕃衍凡占籍番者悉祖  
之安仁吳世儒家宋淳熙間有從朱文公  
講學曰某皆其譜謀公之曾祖岳祖夢旂  
養潛樂幽丘園晏如也父鑑服儒業言行  
矩範閭里是否能持平善諭俾率初後皆  
尊信之劬書教子誨之曰學非以干祿遇  
不遇命也故公受其訓而行之幼靜默寡  
嗜好達生養和非仁義之言不言其居家  
也斥絕喜愠躬行以導之不逮者微語以

警之其處于鄉也肅然如有容暴者化之  
以慈有為不善者輒自勵曰得無吳公知  
吾所為乎幼督之以學壯獎之以仕稍有  
能輒譽之其成就也怡色若已得年益者  
賓客造戶無惰媮酒至愈莊夜分猶危坐  
治纖悉人皆曰吳公有子全節為玄教嗣  
師總攝江淮荆襄道教崇文弘道玄德真  
人其好賢其持身常念若不及繫家教所  
致推公之德視其子則猶可企也延祐六  
年五月玄德扈 駕上京楠以待罪集賢

偕行公薨以五月丙辰訃至玄德晝夜哭  
不絕泣且曰全節不天疾驅以歸願述先  
公之行以聲其哀恸謝曰述德叙行宜在  
門人佐吏敢辭則又曰猶子善辱與子游  
其何辭謹按玄德真人幼慕老子道年二  
十從大宗師開府張公入朝奉祠宮間  
歲告歸省

成宗皇帝憫許之大德八年公與夫人壽  
七十

上賜公上尊加帛俾乘傳以歸大德十一

年特拜翰林學士中順大夫至大三年  
武宗皇帝隆孝治恩賚中外臣子繇是超  
拜榮祿大夫司徒饒國公配舒氏饒國夫  
人而公考亦追贈昭文館大學士資善大  
夫饒國公謚文靖妣陳氏饒國夫人玄德  
奉制書以歸延祐元年公壽八十  
天子遵

成宗錫賜如故事延祐四年復降璽書  
復其家命守臣王都中表鄉曰榮祿里曰  
具慶玄德築公所居堂曰晚香曰天爵翰

林侍讀學士元公明善記之矣曰齊老則  
因宋孝宗所書扁以徵其實曰樵隱公所  
居自號以寓其冲澹之意焉公壽八十有  
五將以某月某日葬于鄉之山田原子四  
人長詢次誠蚤卒次玄德真人次全義女  
若干人孫男若干人善集賢脩撰蒙剛才  
致孫女若干人曾孫男女若干人始善來  
京師從游嘗出大父手書誠善制酒力纂  
述勿愒玩以自棄又誠其叔父持敬存誠  
為應天事神之本日承君師母以我耄為

辭幸未棄昭代嘗惕然深念曷報稱數數  
道途非所望假我死何憾也水蹇於山屈  
曲演迤遇順而始達非偶然也養深用嗇  
累遠益振於吳氏有考世胄顛覆抑其所  
發者誠過耶嗚呼吾於是見之矣楠也辱  
再世之游耳受目矚向爲史官錫命享醴  
之禮嚴詳於記註惇史純孝贊皇風闡鴻  
藻有自來矣遂不克讓奉于太史俾有攷  
焉延祐六年七月日具官袁楠述

清容居士集卷第三十二





賣衣買書志亦迂  
愛護不異隨侯珠  
有假不返遭神誅  
子孫嚮之何其愚

清容居士集卷第三十三

表誌

西山阡表

嗚呼我大父嚴州宋寶祐五年丁巳六月七日庚寅即世年六十有七後六十有七年是爲

皇元至治三年歲在癸亥

聖天子推恩文武錫命有秩不肖孫拙以從臣遂得贈中順大夫上騎都尉會稽郡伯大母令人王氏會稽郡君是歲五月



丞相忠獻王薦于

英宗超拜侍講學士泰定元年又贈嘉議  
大夫禮部尚書上輕車都尉會稽郡侯郡  
君加會稽郡夫人嗚呼揃生七日而母史  
夫人卒先考處州嘗語曰汝外祖敷文  
轉運公諱賓之淳祐十一年辛亥歲秋八  
月病且革嚴州訶疾候所命于時汝母  
年六歲余年七歲即指曰吾女以中外表  
願奉公幼子大父謝且立曰幼子獲爲  
越忠定王孫壻宅日生孫寧負吾兩門哉

桷泣受其語以識桷鬪時喜聞遺事于  
時越公賓客子孫宦途著仕而大父  
遊從咸在嘗語曰越公爲京尹十有一  
年擿括隱伏抑強振惠繫汝大父密以  
贊外若常布使世不知有子弟名字其居  
越公喪盡喪禮喪除廬于墓不入城府者  
三年匪惟鄉人言之外州士大夫能言之  
退考于家乘曰初補承務郎監無爲縣襄  
安鎮知建寧府浦城縣丞越公久侍從  
陞政府而執政子求外仕令不許故再任

清容居士集卷三十一  
佑神觀紹定四年越公解機政始得授  
江南東路安撫司幹辦公事端平二年以  
侍養請于朝優許之充沿海制置司機宜  
文字淳祐七年通判嘉興兼尚書省提領  
田事所檢閱廼曰吾得以仕矣治府事無  
留難囹圄以空悉以越公尹京法治之  
郡守謝不能提領戶部財用史宅之悉括  
諸司田阿媚奉上具籍百餘萬用戶部印  
入御府而以副帙置三省始愀然曰吾不  
可復治乞歸三年授江陰軍力辭以疾後

戶部果督責浙西諸州虛籍守臣爭納告  
丐罷言諸司田皆朝廷舊籍欲入虛籍則  
宜蠲舊籍未幾宅之死始悔罷而副帙在  
三省者國亡散落民間言利大臣深信之  
卒為東南害十一年知嚴州寶祐二年提  
舉台州崇道觀積官至中散大夫鄞縣開  
國子先處州登朝贈中奉大夫再以登  
極恩贈中大夫維我大父訓範嚴密居  
家治具畢舉區別工技悉精其能堂奧危  
坐無笑色聚書至數萬卷圖畫鼎彝鑒裁

得源委而先處州遵奉誠令教子晝夜  
不廢稍得以譎薄文藝叙升翰苑幾二十  
年再為集賢直學士今復超進為翰林侍  
講學士夙昔期望於遺言見之今墓在桃  
源之西山王氏夫人合葬焉大父諱似  
道字子淵曾祖諱皇累贈太保妣楊氏  
越國夫人楊氏魯國夫人祖諱昇累贈  
太師衛國公妣楊氏齊國夫人考諱  
韶少傅同知樞密院事資政殿大學士累  
贈太師越國公妣陳氏周國夫人配王

氏平江府吳江縣癯庵先生份之四世孫  
蘇養直向伯恭張安國朱元晦諸賢賦詩  
于其家圃有詩集十卷行於世長子諱浚  
奉議郎淮西制置司機宜文字入

皇元改授承務郎賓州同知娶史氏孫四  
曰棟棋榘栒孫女十曾孫五彥毅亨端辛  
孫女一先處州諱洪朝列大夫同知處  
州路總管府事贈中奉大夫浙東道宣慰  
使都元帥護軍會稽郡公娶史氏楊氏並  
追封會稽郡夫人子楠為嫡長孫女三曾

孫二瓊瑾女四人四世孫男曦曄女德秀  
素為鄞聞姓晉政府繇越公始至子  
大父承緒展世不赫赫以求高命所居堂  
曰拙逸曰得閒殆見其雅志將以俟于後  
矣夫德厚者報深恃報自佚必不能以顯  
郡公事兄若父讓爵避財鄉黨至今能言  
惴慄四十年而教子督切則曰我大父之  
訓我不敢私今雖未底于成詩書之澤殆  
能以自白歲月逾邁交友故吏漸落幾盡  
隧碑有缺幾於無傳是則有罪矧以不腆



之文行于南北庸述祖德刻于墓道俾子  
孫有考泰定元年歲次甲子 月 日孫  
具官摘表

先大夫行述

先大夫諱洪字季源姓袁氏素為明州著  
姓州陞為慶元宋仁宗朝詔外郡得籍開  
封舉進士嘉祐初為開封舉首者諱軫後  
通判杭州蘇文忠公時為郡太守日論文  
史典處州以終贈光祿大夫其宗諱懿亦  
占籍開封試進士歷官至祥符縣丞因家

焉為公六世祖五世祖諱謂贈少保高  
祖諱皇贈太保靖康難作隨青州兵復歸  
里積善好施年八十餘預言死期別親黨  
沐浴端坐以逝曾祖諱昇為明州助教  
贈太師衛國公樹德力卑讓鄉里尊信郡  
有不軌大獄命公攝治即其家搜驗得偽  
署籍姓名一千餘人皆六縣大家不以送  
官立焚之異行遺事世多所傳錄妣楊氏  
封太恭人贈齊國夫人祖諱韶幼學于  
族父正獻公癸登淳熙丁未第嘉泰禁道

學自趙忠定以下皆入黨正獻公坐廢  
越公為吳江丞得罪蘇師旦俱家居避禍  
嘉定改元褒叙趙忠定公朱文公於是相  
次被召先後為侍從搢紳榮之尹臨安十  
年神明愷悌自辛棄疾揚王休馬大同立  
密以後推公次之為同知樞密院事以資  
政殿大學士銀青光祿大夫奉化郡開國  
公致仕贈太師越國公妣陳氏吉國太夫  
人贈周國夫人 考諱似道中散大夫知  
嚴州總覈事物能通達損益然不樂仕進

守次江陰將行乞祠祿以歸理宗異之贈  
中大夫妣王氏恭人贈令人公嚴州次子  
七歲能諷誦詩書左氏通大義以越公  
遺表恩奏補承務郎年十七試吏部銓監  
鎮江府大軍倉明年道臨安馬先祖以樞  
密為京尹上書往見之馬公喜謂曰是故  
袁越公孫耶光祖治京師皆先公條教今  
官位適相同然貴家諸郎多不達文墨是  
書果子所作當留以自近公謝不敏遂改  
辟監桃源酒庫檄入帥幕時馬公號嚴敏

客多畏避不敢進率秉燭決諸曹事命四  
客坐四隅禁私語夜分間以成案俾閱先  
後是否一日擇卷牘繁冗者以試公公疏  
其要領言是事曲直微有隱某官所擬微  
兩端馬公大喜日以不決事委處分將俾  
徵旁邑逋負公謝曰初入官而以括責稱  
懼失先公遺訓馬公謝之禮部尚書李  
公伯玉薦可治劇邑中書舍人劉公震孫  
薦可理瘠縣馬公去國改兩浙轉運司幹  
辦公事轉運使胡太初刻峭善伺時相意

旨公不樂之請告歸里胡亟怒以綠匣檄  
還司署曰不即來當議劾公起視事或咎  
之迺慰曰太初先子先樞密門下士知  
子能官固若是後潛說友為轉運檄督寧  
國絹十六萬疋公婉謝曰嘉熙以來江東  
稅絹皆虛負實籍寧國尤甚莫若悉蠲虛  
名止取景定至今年逋且昔時嘗以不能  
謝馬公矣說友懼蠲數廣亟命他吏然卒  
不能辦為禮部貢院封彌官甫出院度宗  
忽降手札諭賈某曰舒津太學名士袁洪

嘉定名臣孫宜與陞擢差遣舒同里人賈  
疑有內援遂除舒太常博士公為太社令  
就職兩月諷門下省論而舒亦以他事去  
賈相嘗曰浙東唯溫處士可任事四明士  
不宜用于時高公衡孫趙公汝楫以戶部  
侍郎汪之林以汀州陸合以軍器少監章  
士元以太常少卿趙孟傅以贛州合執政  
官至守倅凡六十餘人皆家居月為一集  
約討論先括言行不得議時事繇是公益  
得紬繹文獻深愛重自晦絕不通京師書

問賈相悉偵知之迺命主管華州雲臺觀  
咸淳壬申遷通判建康府公閱事敏決老  
吏不敢詒慮獄句容有偽楮連坐二百餘  
人悉出之定議止誅其首帥趙潛貴駃不  
親庶務僚屬上府謁不得入率用紫袋取  
畫諾公坐賓次命吏白帥今邊事益急惡  
少年掠奪市上將驕不習兵非紫袋可奉  
行帥聞即延入閣出遜語且曰將循視沿  
江諸屯壘苟可安便者毋忌也甲戌冬十  
有二月帥行郡中大驚爭移徙出郭而村



落民與故侯聯絡者復入城有約白晝罷市公詢扇亂者斬之戒門者毋納村民城中始安夜多火災有徼卒膽對詳練公私以白金立署賊曹一夕卒馳報有賊約以二鼓縱火東門劫門鑰以出今賊俱在廟中治火具公遣卒往伺賊將出廟門捕二人有緼火在手即斬以徇諸將留城者皆故侯部落至是益蹇傲願習射求官賞且曰在昔唯陳招捕習騎射今不能復見此等相公矣翼日將巡城請公乘騎吏擇馴

馬以進公命取將馬來將異之坐城上召諸將曰郡庫非制置使不敢用若等求較射吾當以私財定高下語畢入射將挾矢前喏曰願奉約束然不敢先公手弓遂弦三發皆中華一入的將謝不敢公強之終不能並卒定其賞如初諸將前曰惜侍郎官晚然事不可為公嘿然侍郎蓋江淮間幕府通稱也二月帥調精銳居屯江城中羸卒數百相偶語有卒夜從江滸還言趙制置已南遁數日將解兵還淮西總領費

伯恭棄軍資夜乘舟如通州入海賈相師  
潰歸揚州諸將率故侯部落將劫公出城  
公不得已微服間道歸臨安見太常丞吳  
浚浚奮為沿江參議與公厚善相對各泣  
下公曰國勢日蹙諸將率聞風內叛浚薦  
丞相陳宜中將留用之公願自劾待罪急  
辭去趙公孟傅尹臨安奏為浙西安撫使  
機宜文字不拜趙公制置慶元復奏為沿  
海制置司參議官公時已陞階朝奉郎亦  
不拜乙亥冬臨安奉表降謝太后詔諭東

浙諸郡如命戒毋徒以百姓汙鋒鏑時入  
南軍道上虞餘姚焚掠以行聲言留軍慶  
元備禦居無何王師將壓境公見趙制  
置言南軍以具海舟實無意留旦夕必入  
城縱焚當先攻甬東門宜戒火政分卒保  
東城以全居民未幾果縱火焚浮橋劫江  
許城有備不得入舟出定海以行制置司  
改宣撫司復署為參議人心危疑旁郡邑  
相屯堡未散舊不快意於衣冠者爭上變  
入爵參議官陳允平素與王姓讎讎言新

從福州航海來見陳參議為書蘇都統約以九月乘颿下慶元當出兵以迎又言禮部尚書高衡孫而下三十餘人皆聯署勸進時張元帥督師將征南命招討使王世強圍捕鞠實公儒服立庭祀見王辨陳參議與聯署書實亡有招討故為宋官寧知讎不為虛言王未應有戎服長髯者將登階見公亟下拜持抱曰此吾表侍郎詣王前曰傅海奮為建康壕寨官承宣使阮思聰與侍郎巡城議列木柵阮言城廣不可

守且木柵無所從得傳海峇曰蔣山左右  
巨木可取撤近郊居民屋高下附益可立  
具使果欲守良無難阮故呂太尉姻盛怒  
將以軍律抗對殺海袁侍郎悟旨急叱海  
入獄明日杖海而遣之今不知侍郎何故  
立庭下海願以身贖罪王大驚具賓禮以  
迎且告元帥帥引問之故公言安反側定  
新國當絕告訐羅織翼日元帥盛軍容坐  
府有告者復言奉化昌國某大家以故王  
為名一從台州黃巖來一從海上來帥立

叱去之陳參議亦繇是得脫郡大疫具善藥以施死者給棺以殯後戒以為常行之踰二十年至元十五年從趙公朝京師覲世祖皇帝天語命班秩宜高從行者一等將授總管以子幼辭廼授朝列大夫同知邵武路總管府事以疾不赴至元二十年授温州路同知疾作復辭公幼從王先生鏞學問戒以躬行為持身本每授以言行編諸書公守而行之至是書陶靖節詩顏氏家訓為一編以寄意至元丙戌歲侍御

史程公奉 詔徵士首寄聲起公公遜謝

不敢當大德二年改授處州路同知命下  
而公已捐館實是歲二月十有八日享年  
五十有四 先大夫性孝友事兄賓州如  
父器物田宅賓州所予者猶辭不敢受

嚴州遺澤二悉讓兄子淡嗜好自建康歸  
即獨處清坐嘗曰綺縠聲色非潤身延年  
佳物諸君何慕焉喜賓客終歲無虛日客  
去復具饌以俟不喜言人過或甚不能自  
重者猶覆護言無是事急施與家無長物



嫁娶喪葬有不能舉者悉賑與之愛博而  
內明碩儒故官旁邑外郡俱館致教子弟  
嘗言吾交游宜廣況愛親仁勿為戚否可  
也有客素依公調官京師願奉公文書  
以效勞久之客得官群議咎客公以書慰  
之君果有得猶我之得客出書示議者廼  
止善尺牘琴弈諸藝皆過人不自詫裸每  
言沽名激行為之良易然不可欺於心晚  
歲過郡土神祠梅侍行指謂曰吾言出諸  
口今得視神無愧自丙子來冠履雜糅抑

負不自振嘗開釋防漸而扶植之或利害  
不便必正色廣論絕其萌蘖廼止歿之日  
鄉里無貴賤老穉皆驚惋不絕葬在鄞縣  
桃源鄉慈溪與之原元配史氏太師丞相  
忠定史越王浩之曾孫祖彌堅資政殿學  
士贈太傅謚忠宣考賓之朝議大夫直敷  
文閣荆湖轉運副使再娶楊氏世儒家五  
世入太學景定壬戌太學進士太平州判  
官 之女以宋明堂恩俱贈安人男一  
摘史出女三長適丞相史莊肅公嵩之孫

伯前將仕郎次適工部尚書余天任孫  
昌期前通仕郎次適資政殿大學士史巖  
之孫益伯前承務郎孫男二瓘瑾孫女四  
長適同知餘姚州事趙孟貫餘許嫁未行  
痛惟先大夫言履歷歷在人口耳蚤登  
臚仕將大有為迄不得展究尚義勇斷施  
止於州里而中年泊然退靜莫有知其意  
者不肖孤藐然嗣承懼歲月之久失於傳  
貽將益負不孝願託于立言大賢以求信  
于後世謹述歷官行事辱賜之銘而傳焉

先君子蚤承師友晚固艱貞習益  
之訓傳於過庭述師友淵源錄

王鑑濟南人侍御史伯庠曾孫繇次翁始  
居鄆敦厚寡言幼師之精理學多錄言行  
教人不喜矯飾壬戌進士

張即之叅政孝伯子孝祥從子善爲頌語  
乾道淳熙事月日先後亡異史官李心傳  
嘗質之喜校書經史皆手定善本 嚴州  
奉祠日相過從有絜疾語言清整待僮僕  
亦然書蔽其名書法之壞自張始特加太

中大夫以壽終

趙汝楨善湘子為宰相壻早退自脩精易象有易叙叢書可傳官至戶部侍郎晚歲以理財進用失士譽

李伯玉鄱陽人為右司論事得罪後為禮部尚書薦以政事可作劇邑將入政府卒馬光祖婺州人號吏師改署佐其府性過急斷決無停滯一時新進效之鄉有馬元演時為仁和縣晨坐解決事五百縣大治改官奏舉皆出馬公後為衢州坐殺饑民

罷

劉震孫東平人忠肅公元孫文清公之子  
魏文靖公之壻爲喬丞相行簡樞屬喬相  
與劉嘗言越公尹京政治晚歲爲宗正少  
卿兼中書舍人知爲諸孫署剡曰嘉定名  
臣某有孫敏材宜理瘠縣

胡太初天台人以清苦自檢治與處州季  
鏞同其父越公門下士胡晚始自言事  
見劉克莊所爲銘

劉黻永嘉人左史出治慶元于時奉祠山

中以居鄉清脩薦世號六士  
汪之林里人龍圖閣學士大猷族孫爲諸  
王宮教授守汀州晚歲十年不通時相書  
逮識樓宣獻公言出處大致不可易居同  
里巷貧益甚卒

應文煒奉化縣人精史學年六十始入太  
學蚤游江淮吳毅甫作相兄淵守建康不  
去應作書諷之即謝事毅甫竒之招入相  
府不顧去史嵩之罷相猶子璟鄉上書或  
言應爲輔史相諷所屬掠治應益忿然卒

得脫癸酉歲襄陽降應言世事已去先  
子官金陵戒母携妻孥凡所言得失悉中  
曹說侍講粹中曾孫父爲山陽佐死難幼  
絕葷娶精易象數論語詩春秋皆有解多  
折衷舊說歲一再至易說爲里人所竊今  
不傳聞在松江儒家

王先生應麟兄弟中博學宏詞科爲翰林  
學士禮部尚書咸淳詔冊辭命皆先生所  
作著書有春秋攷逸詩攷古易攷通鑑義  
例攷困學紀聞玉海一百卷文集一百卷



先子命桷受業門下十年  
胡三省天台人寶祐進士賈相館之釋通  
鑑三十年兵難藁三失乙酉歲留袁氏塾  
日手抄定註己丑寇作以書藏窖中得免  
定註今在家

吳浚建昌人喜論兵爲建康參議數凌侮  
郡將賈相督師舟泊龍灣客謁不得入吳  
大慟賈竒之後入爲王宮教授累遷起居  
舍人嘗薦先子于陳丞相入南起義兵  
事不濟議降文丞相殺之

戴表元辛未進士善論策失仕歸里力從  
諸先生能古文爲金陵教授時與之同官  
家貧衣食喪葬咸賙之後留塾中有榆林  
集五十卷

黃震慈溪縣人以清介聞賈相知之守撫  
州兼本路提點刑獄迄不能合坐論去性  
不喜鄉里獨作書以所爲日抄一編寄贈  
陳蒙鄞縣人國子司業塤之子善筆札治  
獄多探竒嘗疑之後爲淮西總領以浪用  
公帑罷貶建昌晚守溫州夜別先子行

益詭誕子孫散亡不可攷

安劉汴人居鄆之小溪以詩義冠多士善清言三歷祕丞郎官素爲賈相客安以科目自持卒不得顯用

程鉅夫舊名文海郢州人今居建昌善鑒裁爲侍御史時奉詔徵江南遺逸首薦先子以疾辭所薦士皆知名多至大官今爲翰林學士承旨

謝昌元資州人淳祐甲辰別院第一守封州提舉廣東常平幼歲見劉文節公光祖

能道蜀士大夫言行可傳錄言蜀中亡事甚慘僑居于鄞入朝為禮部尚書

青陽夢炎西蜀人使李璿善機辯賈相愛之為荆湖提點刑獄仕

元朝為吏部尚書多智

留夢炎三衢人事見國史晚為翰林承

旨焚香擇吉日薦先子于御史中丞翰

林脩撰汪漢卿與桷官翰林時言之

趙與熏黃巖人篤實無城府睦姻族與

先子俱為史壻官京師歲一遣問官至

翰林學士卒

盛夬金華人邃經學多本項安世氏丞相  
王燭薦爲太學博士後通判慶元

梅應發廣德人與叔祖履道同補太學爲  
慶元教授習詞科卒不成官至太府卿喜  
抄書先世書皆傳寫

舒岳祥台州寧海人七歲能作古文弱冠  
謁吳子良吏部大奇之吳學于陳耆卿舍  
人舍人學于葉適正則以師道自任好譏  
侮晚歲詩益工官慶元時與之游後作書

清客居士集卷三  
十一  
俾桷往事之

劉莊孫學于舒能文詞深沉善精思家貧  
無書傳五經能默與先儒合病癈卒

樓椽宣獻公族孫精曆法言宋司天氣朔  
盈虛當改章法不可用未之信後授時曆  
頒言始驗館于賓州伯父家四十年日布  
筭疑多財者貧老卒

應發孫參知政事徽之子父爲翰林學士  
時能代父書命後秘其父書不出好博以  
蠱死

史蒙卿乙丑進士拙程文默誦五經其學  
喜竒說禮部尚書王公多傳授之卒以竒  
不合于王公

陳定孫參知政事卓之孫爲軍器監丞家  
居四十年歲奉祭祀必哭泣年八十餘廼  
終

余尚賓官至太府寺丞賈相入朝不得調  
孝友誠實鄉里交賢之

謝翱南劍人僧圓志瑞州人俱能古文尚  
嚴簡氣鬱不自舒困死

周密湖州人與陳厚韓翼甫李義山咸淳  
初爲運司同僚俱有吏才約貴日以字稱  
禁近俗名號陳能文端明存之弟韓安陽  
裔孫善持守李豪邁名吏壽朋之孫皆蚤  
卒周中丞秘曾孫晚歲以鑒賞游諸公微  
失雅道

葛慶龍南康人寓居四明僧舍精唐律詩  
酒酣能飛筆爲數百言然棄不復錄有什  
一集極精警游越卒

先夫人行述



嗚呼桷始生之七日已不孝罹禍于先  
夫人音容永隔無所容罪每侍先大夫  
嘗語曰汝生之年歲大熱丙寅為火協于  
支干臨安居民繁湫坐地沃水猶喘息不  
得止茵席器案如執焦汝母體素弱一夕  
暴泄輒不可藥目光已離猶視汝在襍中  
復愀然曰桷來前念至是曷時可忘耶桷  
泣而記之又曰大父嚴州與汝外大  
父敷文公最相好伏臘治具悉相侶商榷  
品目議論好惡無一不膾合汝祖母王

令人史太師甥孫故於敷文通姻好益密  
淳祐辛亥八月敷文病瘳下嚴州日問  
疾敷文力疾言吾有二兒二女皆未姻願  
以穉女屬公幼子吾時年七歲汝母年六  
歲是月嚴州治幣問名閱七日敷文捐  
館嚴州歲時往敷文家撫汝母候筭期  
以主我中饋又無祿嚴州即世景定辛  
酉歸于我史氏號大門伯父賓州嚴峻  
汝母屈意朝夕承候無替惰分至大祭盛  
服俟廟門陳器薦牲饌低首偃立終日不

少動性絜靜無華飾從母廣國夫人為昭  
化軍節度使謝公埜配貴家競侈異獨無  
纖粟模效每一詣親黨歸悉脫去鈿釵嘗  
言教兒嬰孩必蚤加訓整庶無為父母羞  
余年少時習騎射必正色切劘或從廳屏  
偵問所與交有凡近者即掩被就睡明日  
徐曰先丞相家無此客先夫人少母張  
夫人所出張夫人生二女長適謝公先  
夫人既卒謝公日迎張夫人張夫人不肯  
去泣曰吾一外孫曷忍去卒撫字見摘有

室張夫人言外祖敷文方死時汝母坐床  
下泣不置勸之食不食終日坐殯次不離  
服除一詣庶母房至嫁日始再詣別之家  
人莫有識其顏面者梅既長舅氏軍器監  
丞柳州某言忠定越王淳熙中召赴德壽  
慶壽班孝宗曲宴問曰太傅幼子今何姻  
忠定謝不敢孝宗曰吾為太傅成之是時  
崇憲靖王伯圭女方笄即封新安郡主以  
嫁忠宣是生敷文敷文長外家出宰武康  
縣縣滿始歸里敷文言吾祖暨外祖皆真

太師汝曹當謹擇婚對今甥已克堪問學  
慎毋忘外家敷文嘗言而母幼靜簡當有  
成竟迄不享年幸子在猶能慰吾意夫人  
諱棣卿字景華以宋明堂恩追封安人謹  
按史氏譜有舉八行者諱詔贈太師冀國  
公為五世祖曾大父諱浩舊學相孝宗純  
誠厚德歷三公以太師保寧軍節度使魏  
國公致仕追封越王謚忠定妣貝氏封齊  
魏國夫人伯祖諱彌遠相寧宗理宗太師  
中書令祖考諱彌堅資政殿學士光祿大

夫奉化郡開國公致仕贈太傅壯歲尹臨  
安帥湖南多異政中令爲相歷年滋多太  
傅不復肯仕家居十餘年端平改元謚忠  
宣妣趙氏新安郡主封衛國夫人考諱賓  
之朝議大夫直敷文閣荆湖北路轉運副  
使少事丘文定公密以政事稱六爲郡太  
守贈通奉大夫妣王氏恭人丞相忠定魯  
公淮之孫妣葉氏恭人俱贈碩人丙寅歲  
冬十一月葬于鄞縣通遠鄉建奧之原卒  
時年二十有一後三十有三年先處州

不祿懼體魄之不寧遂別葬于桃源鄉慈  
溪奧之原先處州諱洪朝列大夫同知  
處州路總管府事曾祖諱昇贈太師衛  
國公祖諱韶同知樞密院事資政殿大  
學士銀青光祿大夫奉化郡公致仕贈太  
師越國公父諱似道朝議大夫知嚴州  
贈中大夫男一人梅女二人長適丞相莊  
肅史公嵩之孫侶伯前將仕郎次適工部  
尚書余天任孫昌期前通仕郎先大夫  
晚得女一人適資政殿大學士史巖之孫

益伯前承務郎孫男二瓘瑾孫女四長適  
同知餘姚州事趙孟貫餘許嫁未行私念  
桷孤苦不自振擢揆厥有生與先夫人  
違棄之日俱積今宰木已抱過庭之訓懼  
無以貽子孫敢求偉於文詞叙而銘之庶  
得以永考而有傳焉

亡妻鄭氏事狀

亡妻諱某姓鄭氏鄭為明州令族世家于  
鄞始自元祐舉進士至宣和時其孫入辟  
雍有諱某者當孝宗時為郎曹守平江寢



著至太師尚書令忠定魏郡王諱清之以  
舊學相理宗官簿益盛故君之七世祖至  
高祖皆贈太師魯國公長子某國學  
進士贈中太夫妣邊氏封太碩人魯公配  
威夫人素嚴忠定之生夫人將不舉邊氏  
亟詣姑取保乳之長歸于其姑後碩人生  
子諱某與忠定同登嘉定丁丑進士第邊  
碩人卒忠定爲之服衰以報其子亦官至  
中大夫秘書監寶謨閣待制以終於君爲  
祖贈正奉大夫妣汪氏封太碩人待制生

子諱某朝請大夫直祕閣主管建昌軍僊  
都觀於君爲考妣汪氏封宜人淳祐中忠  
定以師臣再相年益高祕閣入閣承侍禪  
贊可否務總約體要纖秒不以類于時賈  
相帥京湖數張皇軍旅邀國用朝廷抑不  
下賈相恨議繇公出辛亥歲丞相薨庚申  
賈入相由是積二十有三年不復出仕  
先處州繇太社令奉祠里居祕閣公多能  
言臺閣舊事數往還是時祕閣新喪子無  
他嗣庚午歲迺得君客至嘗抱立左右錦

襦珠鬚注目不聽去。處州戲曰：他日願  
以爲子婦，祕閣愀然。若有屬，癸酉歲，處  
州通判建康府，將之官。宜人與祕閣餞，飲  
于中堂，共指桷曰：誠宜爲吾壻。是歲，祕閣  
與宜人俱捐館。居第在城東門外。乙亥，兵  
難作，先處州以其遺言，謀于其宗長，始  
歸于我。于時，表宗猶完，盛先廟祭祀，娣姒  
林立，能卑順，盡禮朔望，承問無缺。怠事桷  
外祖母張夫人，甘柔涼燠，調適以宜。張夫  
人嚴整，語相家，內儀和珎，組絲皆精巧。有

度君能耳受目悟而敬成之張夫人病革  
視藥膳連月不入寢處嘗曰新婦不獲事  
先姑得事夫人斯可矣性靜厚寡言笑遇  
事不輒發而是否瞭然不能易故處親黨  
無間言 處州幼撫如己女君偵顏色承  
事幾二十年絕纖粟忤意己丑城中災遺  
物散燬 先處州以它事往吳杭間意忽  
忽不樂間治觴具能使如平盛時秘閣所  
後子不自振君深憂之竊從招提命所子  
歲時以祀其先大德戊戌歲正月君產女

病榮弱桷主史甥姻于抗二月十日丁卯  
亟歸視之則已不及矣大禍仍構又八日  
而我先處州亦捐館舍噫念昔少時私  
欲奮勵學問以自振植先處州愛之廼  
悉總攬酬酢俾不以亂其心不幸志昏能  
薄一無所成立四女二男皆君所出紉箴  
訓飭復能相其夫使有所不知及今一十  
有七年從宦京師藐然孤身若忘其家  
缺內佐之助靡密綜錯日益加多而學益  
以落文誠不能以表君之志敢求於故家

之友人精於言詞者誌而銘之君葬在郵  
縣桃源鄉潘奧之原男瓘次瑾女一嫁餘  
姚州同知趙孟貫餘許嫁未行楠今爲翰  
林待制是爲先樞密太師越公諱韶之  
第四曾孫先嚴州中大夫諱似道之嫡  
孫先處州朝列諱洪之孤子也

外祖母張氏墓記

外祖母張氏諱致和湖州德清人嘉定六  
年七月生父某事趙崇憲靖王父子再世  
部樂伎年七歲通音律楠曾外祖母新安

郡主歸崇王家見而愛之載以歸俾事外  
祖敷文轉運史公稍長爲侍姬戶室靡密  
總覈合繩墨外祖性嚴急挈長覆短使不  
有忤意囊篋甲乙隨旨諭立陳于前如是  
踰三十年生二女長和政郡夫人嫁太尉  
昭化軍節度使謝埜次即先妣會稽郡  
夫人歸于我先考諱洪朝列大夫處州  
路同知總管府事二女皆嫁宰輔家于時  
謝以后族貴顯先處州官臨安常卑讓  
疏之外祖母雖久居相門見謝壻侈靡踰

限制心不樂而多留處州以靜恬自怡  
咸淳二年丙寅夏六月會稽夫人實生桷  
甫七日洞下遽卒又未幾先處州病大  
熱垂死咸言不利於母將及父謝公願取  
已育之處州在病搖手不許外祖母排  
斥詬詈戶之遂日訓飭調適且祝曰兒宜  
爲史氏外翁自重八年謝公死泣曰吾固  
審若是吾盡力撫袁氏外孫他何之訖見  
桷娶婦生女至元二十四年二月  
日卒年七十有五葬于先夫人墓左五



十武幼通書筭善心計處州事有未及始  
諷之終以舊事敷文者言之晚歲病瞽纒  
纒言外家事曰汝外曾祖太傅忠宣公居  
東湖滄洲十有四年不復仕作書諫兄忠  
獻辭相位不輟歲賜生日器幣辭一再始  
受後數年不復受鄭忠定丞相忠宣公塾  
師也敷文受學焉其舊第前爲舊學壽皇  
書後爲授經鄭相書皆有深旨又曰音樂  
慎勿蓄今世公卿女樂皆俚野不足聽惟  
太傅壻趙崇王悉祖樂髓景祐譜調八十

四穿心相通嘗曰譜與易合吾不知易何  
圖可合汝識之又曰丁抗掣曳大住小住  
爲喉舌綱領法曲散序忠宣刪正之曲有  
均猶韻也纍纍貫珠韻不絕也聲有盡拍  
以度非句斷也于時周待制邦彥孫璠於  
太傅爲中外表太師越忠定王嘗命譜清  
真詞手筆具在今付汝雖不解慎勿墜也  
舊以恩賜紅霞帔再封孺人記曰庶母不  
祀於孫而復曰祔于庶祖姑古不墓祭昔  
之大賢嘗慊然矣今夫禮緣於情而義以

制者懼後之昵於私者之過也先王營丘  
壟之大小無貴賤慎其始不幸有沮洳崩  
齧之患焉其修之也必有道是則於吾外  
祖母非有過者矣以孤兒傳處州考其  
所自曰外祖母保鞠之恩重桷二子瓘瑾  
將竦然以加厚外祖母有田若干足以治  
墳壟奉春秋刻于碑陰懼瓘瑾之子若孫  
滅其情義必曰禮有所不載遂具昔之訓  
撫行事立石于墓俾勿墜某年某月某日  
外孫具官袁桷謹誌

清容居士集卷第三十三

清容居士集卷第三十三

三

關化園藏  
Warkwa Library

清容居士集卷第三十四

傳

徐師顏傳

徐君諱師顏字子愚遠祖天聖間繇太末徙新定故所居里以氏得名曰徐閑君始生時蓮出並蒂父母器之稍長讀經史心徹意領年十七授室君白大人當令兒從師外方廼游三衢習進士業入宋太學程試甲乙表流輩性倜儻急難歲饑日具釜鬻滿庭庶值父喪慨曰世俗飯僧爲冥福

吾當活餓者以報親是歲就食者幾萬人  
太守揚潮南書以勵旁邑至元十四年  
詔用兵入南俘虜日繫馬尾疲弱棄道上  
春大疫饑民旁午君出粟募民舁骼坎瘞  
可醫食者親撫視以活遇一女子扶曳蒼  
然氣微屬問之曰吾三衢儒家女命載以  
歸稍長俾爲士人妻客方達可館于君死  
已飭斂具其子辭不能行即指某地葬焉  
復嫁其孤女事繼母至孝一日妻治紉澣  
出微語君聞之自責不居內者幾月母言

亡是叱妻具簪服拜堂下始復初外氏族  
黨嘗質田歲久君束券母前願奉田以償  
其承順率類此始爲信州教授首言于郡  
復儒役七百人署所居曰道悅以奉母會  
母思歸即解去湖南缺提舉官集賢章舉  
之辭曰母在不宜遠游受湖州廼歸秩滿  
視資當入縣佐君言昔爲太學諸生中繩  
墨始得郡博士博士古官何縣佐爲復授  
太平路教授所至必先新學宮嚴餼廩安  
定胡先生墓浮屠氏將夷圮之君力復而

致祀焉在太平時治丁蘭王祥諸祠墓於  
仁孝殆天性待諸生穆如也晚得未疾卒  
時年七十有四曾祖某祖某子男九人觀  
先卒頤爲族弟仲龍後艮革爲長興州教  
授節處州路教授益晉萃復未仕女二方  
丙子時游騎入人居大索二女爭死之孫  
男二十人女三曾孫男女三人所著有上  
饒集吳興集姑熟集北游錄凡十卷大理  
卿陵陽牟公序其詩曰事親若徐積詩亦  
侶之其子革留京師將歸泣言于袁桷



曰先人力詩書宦不充其德遺行又泯邊  
弗表見革等何以自樹將乞銘于翰林學  
士廣平程公以表墓子爲之傳藏于家其  
可乎廼弗敢辭

贊曰周官以鄉三物教萬民任恤之道戰  
國而降挾持以干異幾於靡矣若徐君者  
不翕翕以近名禮以爲防恬然孝謹彌老  
益安子孫滿門歿猶有稱旨哉

蕭御史家傳

公諱泰登字則平姓蕭氏遠祖繇唐末遷

長沙占籍廬陵太和縣代有吉士曾祖諱  
逢辰官至中大夫當開慶間以安撫使副  
守鄉郡兵至卒急群議撤近郊民居爲清  
野大夫持議不下城守兵去里人德之晚  
歲築宅一區立田八百畝聚其族以教厚  
德行裕生德安府觀察支使諱安中稱其  
先猷蚤歲以亡德安生中順大夫瓊州安  
撫副使諱元永玉雪矜謹倜儻自榮是生  
則平方幼時頭角嶄異九歲入鄉校治論  
語義屬筆精警稍長忽自悟儒以道得名

事物險易當品節中理齷齪翦翦無益也  
弱冠試吏調永豐丞永豐多盜區跡巢穴  
僂之丞以治稱入京師授湖南儒學副  
提舉振直士氣使治靡密者不敢撓部使  
者徐琰竒之言可爲御史府屬會徐爲中  
丞亟力言遂僉廣東道提刑按察司事廣  
東介絕嶺海幽篁深水蠻獠縱恣郡吏私  
表裏聲言獠不可治白日剽劫子女財物  
公贈遺良吏清謹者皆避讓郡縣多版授  
官姦宄馴積莫問使者循行擇善地坐歲

月即去至則躬歷所部劾治與獠相根蒂  
及積貪濫者八十七人皆罷之減始興貢  
銀之半䟽其可宜行于臺者凡二十便事  
廣東民繇是知 朝廷有犯賊律焉初至  
廣時謹言獠寇入境亦欲以是嘗試一坐  
大驚徐曰督盜守令職署舍在是卒有警  
我輩何自即上馬出境軍將爭率兵以進  
獠廼退是歲至元二十八年  
天子下議群臣言按察官糜爛不任職更  
名曰肅政廉訪司遂以舊職解後新使者

及御史咸言蕭按察治事纔二百日所論  
按皆引直當法不宜以舊官同罷牘甫上  
御史大夫書牘曰須選用元貞改元

成宗即位罷兵安南釋陪臣陶子竒歸命  
李衍爲禮部侍郎奉詔往使之遂拜兵  
部郎中介其事明年二月入安南世子遣  
僞署官曰太尉迎詔空首不至地因問  
何得爾僞太尉曰國世子未至不敢先以  
黃蓋二皂衣數十人清路入館世子髡首  
跣足率從吏百餘人至館門前問

聖天子起居却立曰主上新即大位二  
使者辱入弊境道里勞遠秋毫無所取誠  
切感抃敢昧死願聞明詔大意侍郎目  
郎中郎中前曰昔廼先王先諸蠻款附  
朝廷錄舊功將錫宥于汝小邦汝曷敢不  
祇畏畏克敬廼不墜厥命或少縱自恣天  
憲速罰弗敢逭宜肅恭盡事世子錯愕唯  
唯越三日備伏奉綵輿率朝服數十人導  
詔從褥道中行入其宮世子後從二使者  
授詔世子拜伏讀詔興稽顙曰小臣

不自意獲寬大如是復命再拜遂定慰賀  
皇帝 皇太后 皇后表牋貢物儀注成  
禮廼還道縣思明時思明帥言石西州祿  
州皆 本朝地爲安南所侵幾二百里彼  
詭言山溪蠻阮盪出沒不相統虛文歲往  
來無益至永平寨寨故宋戍兵遮道言實  
安南部領侵撓不得耕耨回首語陶子竒  
山溪蠻誠所屬吳璠令不可止今已目覩  
當語而世子子竒不能對至是復命歸地  
蠻吏上下顧吝遂言吾非以侵疆來石西

地不足輕重設奉辭致討汝何以自洗各  
屏息一口盡歸侵地故右丞相太傅公時  
治湖廣省聞復地亟喜之爲設宴以勞凡  
安南所贈遺悉返之明年遷連州又明年  
改爲江西儒學提舉儒者用廢已久新舊  
持短長科舉律令交排鄙不中節至則擇  
知名士禮致之導誘後生斟酌可能行者  
爲繩準省檄慮囚有巡官及富民殺人誘  
傭奴以財俾自誣伏獄屢閱無異詞徐跡  
處所及所持刃亡有獨引囚曰若是汝當



死咸歎實得出會 詔使按問諸道守令  
治狀使回丞相問官吏孰廉使以儒學官  
蕭秦登對四年僉嶺南廣西道廉訪司事  
海南都元帥薛閣干聲燄震海上多所爲  
姦利不法立具章劾有 詔雜治抵罪覈  
殺無罪七人焚掠村堡二十四奪私沒奴  
婢六百七十五雜畜三千六百五十五過  
柳州出妖民誣註者百三十七凡黜吏二  
百一十罷攝吏四十一六年進奉直大夫  
江南行臺監察御史分守江浙行省會歲

大饑吳流民扶曳滿道已定議出官粟守法吏言非朝旨不得擅語曰民命在旦夕後有詰責已稍貲以償何害為行省吏牘積糶叢雜首尾銜絡搖手莫敢問時已得疾呼掾史詰難視罪輕重悉坐之又別為副書筆其事使後母有出入群吏大驚是歲八月疾漸革趣治棺斂手書屬其子語侍疾者勿宜受贈賻遂登舟不復言卒時年三十有八歸葬于其鄉螺岡門外配楊氏繼彭氏子男三文孫憲孫昇孫女三

大夫天性明爽閱具獄率不爲吏蔽探情  
傳意多所出活非曲假恩貸以自異重然  
諾容采精絢達官大人皆傾耳與論事或  
言太剛必折徐正色曰今世士無有剛果  
折何憂也長子文孫靜專自脩留京師  
授翰林學士程公銘俾爲家傳念與公同  
年生相後纔一月蕭薄不自振然職在太  
史筆削傳信惟謹廼弗辭

贊曰大江以南號多公卿比數十年闕焉  
無聞者何邪官御史府斬斬五六人或以

激毀或以悞譏獨蕭公精謹自持正靜益  
明物莫能逃守儒知通据法不阿使叅錯  
天下三年可成也年不衍用名益以昌何  
恨焉

史母程氏傳

嗚呼余嘗得三卯錄讀之蜀禍之慘誠忍  
言也夫朱禩孫之死而復生也蜀民就死  
率五十人爲一聚以刀悉刺之廼積其屍  
至暮疑不死復刺之禩孫屍積于下暮刺  
者偶不及屍血淋漓入禩孫口夜半始蘇

匍匐入林薄匿宅所後出蜀爲樞密使嘗  
袒視人未嘗不泣下賀靖權成都錄城中  
骸骨一百四十萬城外者不計嗚呼推是  
考蓋可悲也蜀眉州史氏由唐吏部侍郎  
儼從僖宗幸蜀因家焉其先墓在青神將  
二十世宋世號名族其出蜀也今唯居湖  
州一房讀其遺事益悲之史母程夫人蘇  
文忠公之母之族也夫人將携其家下峽  
江以橐金腰纏之兵暴至伏林莽與鄰嫗  
謀曰輸金果可生吾兒無資不復能出蜀

史宗誠無噍類矣縱得生旦夕兵復至亦  
決死均死死以全史兒誠不恨嫗見身死  
爲吾出腰中金告兒使速走湏史兵果執  
母謝以實亡金遂遇害翼日嫗語于鄰告  
史氏兒兒年甫十三從草野得尸如其言  
寔以歸且亟圖其象識曰史光母年五十  
有四嘉熙二年十月二十有七日申時死  
兵難兒遂東南來占籍湖州刻意自奮以  
右科爲浙東兵馬鈐轄鈐轄生子圭文嘉  
定儒學教授嘉定生子台孫某台孫儒術

通吏文復有子幾人而史氏繇嘉熙至于  
今且四傳矣噫蜀繇秦帝入中夏至于宋  
凡一千五百餘年文物大盛絕不知有兵  
革一旦掃削殆盡迄今百餘年遺墟敗棘  
郡縣降廢幾半可哀也已可哀也已  
贊曰婦人內德不出門房中歌廢戰國而  
下俱不幸以著非得已也諱莫甚於死從  
容反復烈士猶難之况士女乎歐陽公傳  
斷臂婦人以愧馮道夫人以死傳宗承平  
世澤於是乎見作史者烏得廢諸延祐七

年十月壬子前史官會稽袁桷撰

孫孝子傳

表厥宅里首於唐虞若是則失其本心者見於上古歟司馬遷傳貨殖滑稽或者譏其有激五典爲治之本捨正而求異於世道何補焉晉唐作史始立孝友勸勵後世靡然嚮風深有取焉孫孝子楫字濟川世爲保定雄州新城人幼倜儻讀書通大義其喪父也遵禮而不瀆後調宣德尹慨然曰吾惟母存何仕爲不踰月謝去事母以



上壽終而歸于田野者凡十七年兄蚤喪  
奉嫂彌謹卒爲兄子授室姊贅李氏于家  
三十年將異居營近市高燥以奉姊姊大  
慰喜錄其孤有成性重然諾不自表裸有  
故人喪至日將葬適以故不及送抵暮促  
騎以往夜已分一家大驚其待友也有挂  
劍之義焉其居鄉隱約自持鄉多宦家絕  
不通問鄉人咸曰此孫孝子居也卒上其  
行于朝表其門閭始爲燕南府史錄事  
襄陽繼授宣德繇宣德名始著調興和路

經歷改河東憲府屬又調濟南卒拜監察  
御史今爲浙東道廉訪僉事其行事不阿  
多可紀余獨著其孝行於父母兄弟朋友  
兼盡故特書太原郭幹卿嘗曰孫濟川少  
歲能以其妻奩物償父兄逋一難能兄無  
子買妾以奉二難能郭靳許可今考其行  
信然前史官袁桷曰曩在史院時嘗纂次  
世祖以來功臣列傳考實錄所著旌表令  
尤諄切至作隱逸孝行訖未有章灼篤實  
可以詔後世若孫孝子允其人哉

韓威敏公家傳

公諱政字君用姓韓氏高祖諱天麟知金  
臨潢府有惠政民祠奉之卒葬城南因家  
焉曾祖諱垂高州節度妣李氏祖文卿知  
耀州妣孫氏貞祐避兵南遷臨淄今爲益  
都人父松之膂力善戰四駙馬募兵南征  
與之俱至下邳主將竒其勇俾率益都兵  
戍山陽戊子歲攻宋揚州歿于陣公時年  
五歲妣劉氏挈以家山陽明年益都爲  
皇元所破淮南城守爭遁去劉氏走奔莒

居烽火山劉母家沂州其舅業醫命習之  
盡得其術復遇一醫繇是益精稍長猶隱  
醫以自活山東連歲大擾入于汴復歸臨  
朐又復還青社時甫弱冠見叔父順始得  
拜淄州諸瑩廼復從軍取海州掠東海破  
漣水皆在功簿塔察大王鎮遼東召以公  
從至于龍庭與議事不合卒以其嘗所計  
畫者告于

世祖皇帝遂悉以邊陲大事委之至元十  
三年討西羌相威國王領兵即授嘉議大

夫漢軍元帥監軍事佩金虎符軍中大將  
曰監軍非國姓不得領

裕宗在東宮心亦疑會入辭命以鎮庫弓  
挽之彀而復引者三始曰

大帝善任使若是賜金錦衣一以行西入  
大磧斬馘凱聞還軍至臨潢得拜祖墓其  
碑記猶在十五年立五衛首授前衛親軍  
副都元帥指揮使復兼領左右衛屯田軍  
馬紀律整遏卒莫敢譁奏以屯田各歸  
于衛而治其無良者則諸衛各有統屬

上從之秋繕修大明殿以治具稱十九年  
加正議大夫充樞密院判官二十年進治  
書侍御史二十三年改淮東道按察使善  
決事有拾遺者告于其所失輒誣以金公  
遺拾遺者而叱去之商人暴死于旅邸疑  
邸人殺之驗其嗜炙有毒邸人得釋其餘  
行事徃徃與傳記相合常出能吏上薦士  
十三人率致位通顯在御史府定議盧右  
丞牟利罪卒流徙之二十六年卒于官年  
六十有六葬于某鄉贈嘉議大夫 部尚

書上輕車都尉南陽郡侯謚威敏娶孫氏  
袁氏石氏殷氏男八拱承務郎廣州路增  
城縣尹次振搏奉政大夫慶元路昌國知  
州拯御藥院副使次樞皆蚤卒次揆扶持  
女十人孫男若干人搏之治昌國也興儒  
學建三皇祠嘗紀其美績且命作家傳讀  
其隧碑龕慶趾媿有自來矣  
贊曰貞祐兵興中原士人無噍類獨臨潢  
以遺愛祠葬茲土三世牧守至於曾孫死  
事有光威敏是承北省臨潢南保臨淄難

矣哉政合古先不茹不吐子孫繩繩宜哉  
有元開府儀同三司上卿輔成贊  
化保運玄教大宗師張公家傳

公諱留孫字師漢系出清河東武城張氏  
留侯良之裔孫歆爲司徒歆弟協爲衛尉  
生魏太山太守岱自河內徙清河七代孫  
彛徙魏州昌樂爲後魏侍中謚孝侯子始  
均復謚孝侯侯生晏之比齊兗州刺史  
生虔雄爲隋陽城令是生文瓘相唐高宗  
子潛揚州刺史揚州生齊爲杭州刺史始



居江南至公十五世今爲信州貴溪縣人  
曾祖宏綱集賢大學士光祿大夫柱國魏  
國公謚安惠祖粹夫金紫光祿大夫大司  
徒上柱國魏國公謚康穆皆以公貴贈父  
九德太中大夫同知江東道宣慰使司事  
累贈開府儀同三司大司徒上柱國魏國  
公謚文簡公兄聞詩學道龍虎山見而慕  
之遂服道士服以漢天師所傳授游江淮  
間儀觀頎整見者尊異咸願受其說有相  
者曰當貴極人臣而清竒絕俗視陶弘景

葉法靜殆將過之

世祖皇帝平江南召嗣天師宗演選公從  
行北方地高寒皆不樂居中遂委任其事  
門室清泊處之晏如也

世祖祠幄殿

裕宗入侍風雨卒至召見于

上見其貌異常士而奏對簡異益器之  
風雨隨止遂賜廩給裘服俾歲從北巡

上與

昭睿順聖皇后駐日月山

后疾甚召至命愈其疾若有神人獻夢于  
后遂愈

上大喜命爲上卿鑄寶劔鏤其文曰

大元賜張上卿敕兩都各建崇真宮朝夕  
從駕日昃命衛士提輿以歸內侍強登輿  
謝不受即步出禁門十五年加玄教宗師  
授道教都提點管領江北淮東淮西荆襄  
道教事佩銀印明年奏復宮觀令自別爲  
籍有獻言者道箴經多殺雜宜焚去不錄  
遂密啓

裕宗黃老書漢帝遵守清淨嘗以治天下  
非臣敢私言願 殿下敷奏後

上大悟召翰林集賢議定上章祠祭等儀  
注訖行于世十七年奉 詔祠名山川給  
驛馬五十令訪遺逸以進 敕輔臣設宴  
崇真宮復餞于國南門外回朝以所見聞  
刻于 上上悉用之十八年七月

皇曾孫生是爲

武宗 上命擇嘉名以進是歲今翰林集  
賢院爲兩道教專掌集賢始自公議二十

二年

仁宗生復召命名今

二帝廟諱雖用國語皆以公名義釋之二  
十五年預議集賢院賜七寶冠金錦衣玉  
珮珠履二十八年丞相桑哥敗上欲相  
完澤穆卜之得同人之豫公曰同人柔得  
位而應乎乾豫利建侯同人為得位豫為  
建侯彖傳之辭也 陛下所擬為無疑  
未幾拜完澤公為相後卒受遺輔政二十  
九年開通惠河 上問果便利對曰漕為

國本孰敢議非是誠減民力取實效民必  
趨之繇是河役卒不爲民病三十一年  
上不豫遣內侍諭

隆福太后曰張上卿朕舊臣必能善事

太子太子繇軍中歸即

帝位是爲

成宗皇帝

成宗慕道家說葢祀彌盛在宥十年歲輒  
祠上帝侈甚秘祝御名皆上所自署  
後有白鶴翔雲中命詞臣叙紀付史館元

貞元年同知集賢院道教事大德三年加  
大宗師別給銀印視二品上御便殿命  
講南華經七年上京旱兩京山西地震復  
命祠祝謝曰祠祝實臣職祭不欲數地道  
主靜厥罰惟賜見於五行傳災繇人興願  
應天以實布德賑惠臣敢稽首以請  
上深領之八年上御玉德殿賜玉冠  
爲壽十年制授上卿十一年  
興聖皇太后自懷孟還宮  
武宗即位加大真人知集賢院事至大二

年領集賢院位大學士上是歲再加特進  
時

仁宗在東宮進講老子自是入侍必賜坐  
皇慶元年錫弼輔成贊化二年命將作臣  
製玉刻文曰玄教大宗師手授曰以是傳  
教俾永遠延祐二年群臣侍嘉禧殿  
上曰先朝備陟降持保無瑕缺者孰在咸  
未有對上語曰張上卿其人乎衆唯  
唯遂制授開府儀同三司弼加保運四  
年以七十特敕設于其宮伎部畢列宰輔



以下咸奉壽復命圖像鎮崇真宮賜璽文  
曰

皇帝之寶命翰林學士承旨趙孟頫爲贊  
兩宮傳賜翌日入謝俛奏曰臣際遇

累朝惕惕顧念罔有替今年且衰耄不去  
辱 聖世願歸老鄉里即死且不朽

上不允七年

英宗皇帝即位遵 累聖優褒禮再降

璽書至治元年益求去十二月壬子酌酒  
會弟子少頃入寢室脩靜端坐以化歛之

日顏色完好舉體如蛻羽兩宮震悼賻贈  
有加宰輔至于士類咸曰福人逝矣傾城  
耄稚則曰善人亡矣皆弔哭盡哀及啓鞠  
木冰載路觀者嗟愕始從日月山  
世祖即命公爲天師却立以謝曰嗣天師  
漢張陵之裔今居龍虎山願正其傳繇自  
三十六代嗣師宗演至于今凡四傳皆公  
所匡翊美鬚長大癯然冲退不擇貴賤傾  
下承接奏告廣殿音聲激鏞鐘聞者凜竦  
賚錫無虛歲未嘗奉已屢錫田園以食其

徒當至元末歲

成宗新嗣位時宰不快於御史臺

成宗是其言讓責中丞崔公或崔懼問策  
安在曰當見丞相釋所以遂與俱詣相府  
相怒霽又與同謁近臣言御史臺

世祖皇帝建立專以懲姦悞勢尊則綱紀  
明削之則臺不能立矣近臣大驚入言于  
上明日大宴大明殿諭崔曰臺爲朕耳目  
朕曷不知憂卿等不職故告諭宜勿懼其  
盡心焉朕行爲汝增重矣崔頓首拜手謝

其彌縫國體婉順若是至於排解薦助人  
不知所自亦不肯自以為功絕口不言朝  
政貴客至爭短長酒盡三爵即假寐客去  
禮復初暨喪還州郡縣接祭以俟今葬某  
縣某鄉祖師八人皆贈真人事在傳宗碑  
今嗣玄教為吳全節授特進上卿玄教宗  
師崇文弘道玄德真人以真人佩銀印者  
三人夏文泳江淮荆襄等處道教都提點  
曰毛穎達掌遁教事曰王壽衍領杭州開  
元宮以真人制書命者三曰余以誠領

鎮江路諸宮觀曰孫益謙領杭州佑聖觀  
延祥觀曰陳日新承詔興聖宮以璽  
書命者九曰何恩榮提點信州真慶宮曰  
李奕芳提點南嶽廟兼衡山昭聖宮壽寧  
宮曰張嗣房提點潭州嶽麓宮曰薛廷鳳  
舒致祥張德隆薛玄義徐天麟丁應松皆  
奉兩宮崇真祠事其它弟子三十有八曰  
上官與齡何斯可彭齊年薛起東李世昌  
陳彥倫詹處敬于有興王景平蔡仲哲彭  
堯臣張汝翼馮瑞京祝永慶蔡允中張善

式董龔常王國賓曹載靜余克剛丁迪吉  
張居遜董宇定王用亨張顯良徐守勤彭  
一寧劉若冲彭師尹張逢吉趙有立程某  
施某葉某童某倪某上官某李某公子  
榮祖弟子熙祖亦以公故入宿衛榮祖爲  
邵武路同知熙祖爲衢州路同知泰定二  
年

今上召全節曰玄教汝祖闡立其爲朕祈  
永遂大祠于長春復追贈某官前史官贊  
曰

世祖皇帝闔一海宇蒐遺逸選藝能靡然踵來江南持政柄者不一二人卒不能善終何哉在御三十四年命相幾二十餘人或解罷或斥逐獨張公無少疵病目覩成敗至于五朝難矣哉蓋其行無迹曲焉以全得老氏之旨五福斯脩前古鮮著詩云昭明有融高朗令終張公其近之

拜住元帥出使事實

至元二十九年今浙東元帥拜住公奉世祖旨以行軍招安使從征爪哇于時高

王二將爲蠻兵所圍公深入拔圍出之元  
貞二年奉

成宗旨使西域哈贊王愛其才以尚衣職  
行軍有戰功賞金符金帶因令其入見于  
成宗復賜虎符皇慶二年

仁宗以金印賜丞相孛羅且俾往哈兒班  
答王所議事至中途遇也先不花王疑有  
間諜執以問答曰今上所遣不過通  
歲時問禮曷有他意王左右曰使者往來  
皆言有啓邊生事形迹汝此行宜得要領



可實言否則榜掠汝亦必言遂命跪大雪  
以問且搜其衣中無所有公曰王所問實  
不知且王從何所得是議王曰阿必失哈  
至是嘗言之且曰哈兒班答王上近支  
也吾等族屬存與留不可知後使者至必  
有處分今汝往彼必生事速吐情以告我  
曰王擁兵遮道使者急求去多詭辭以脫  
阿必失哈曷可信左右曰彼統軍九萬寧  
肯不自愛惜詐言以求脫遂縛公兩手納  
諸股擊之廼曰有璽書具在使臣往來

有後先拜住萬死實不知取 璽書視之  
始曰彼果無罪遂奪其虎符及丞相金印  
拘囚王所延祐元年王興兵內寇復遣使  
召公至獵所曰我已入汝境土矣公曰兄  
弟之國無內外彼地亦王地王徃何所疑  
王曰親踈既分釁隙已兆勢不得不爾公  
徐言在昔  
太祖皇帝西征有訓若曰人不可以信讒  
讒入則宗親乖離宗親既離則百姓他適  
將貽笑於敵國拜住嘗聞在

成宗時先王有盟興滅國開關塞以安百姓今言猶未泯絕使者掉舌生異同令王致疑拜住等良不稱職敢叩頭死罪以請王解顏曰吾欲遣汝詣 上通好何如公謝不能時有不內附者梗於路遂罷行復以公徃昔拘所未幾王薨延祐七年弟怯別王立王召曰在昔先王嘗遣汝詣上前後不果汝今宜以素所具 奏者以聞是年秋入朝 上曰太祖造邦孔艱惟和好惇叙則宗支允寧

汝其以元帥職名乘驛諭朕意王既受  
上旨拊膺謝曰疆宇寧敕自此始汝來何  
遲也對曰使副有疾在道故不得速進王  
曰來旨極善使他人來吾亦不若是深信  
大較使臣多擅增減致啓邊禍公曰拜住  
來途中聆逃人言且云復將有兵變拜住  
實不信懼王惑其言而行人之言不得信  
于上是爲虛行王宜孰察善計慮拜住  
不敢他引古事爲比維昔  
定宗皇帝征把禿王有滅國真薛禪使者

諫罷征嘗喻

太祖得國之本明配日月量侔江海合天地之大德故能混一海宇滅國真薛禪死已久拜住不才願踵其策以獻後王從公言奏于上訖如約以平王遂遣使收兵四境而少尼其行且曰邏者猝遇將害汝遂設宴三日給符信護行俾歸于朝至治元年三月抵上京入見于上而王亦遣使奏拜住兩爲行人不愛其身隆爵厚職所不吝然除拜非吾所預爲語朝

廷大臣善奏於上使得享至樂建牙纛  
爲諸侯表得矣是年冬丞相拜住入奏  
嘉禧殿具以功簿言廼拜中奉大夫浙東  
道宣慰使都元帥官既滿類集行事俾桷  
爲奉使事實云前史官袁桷曰  
太祖皇帝經畫區夏以磐石宗犬牙於龍  
興絕域之地四履奠安盛矣夫疆域既廣  
詔旨上意傳諭失實則時致疑爭拜住公  
間關險阻百愒不撓義正功倍以數百語  
解百萬之師非精白一心曷底于是計勲



清容居士集卷三十四

三十四

清容居士集卷第三十四

開化圖書館  
Kaihua Library



開化圖書館

Kaishua library

開化圖書館

Kaichua library

丁

關化圖書館

Kaithwa Library

開化圖書館

kaikwa library

Blue Cyan Green Yellow Red Magenta White 3/Color

TIFFEN Color Control Patches © The Tiffen Company, 2007

Inches Centimetres 1 2 3 4 5 6 7 8 9 10 11 12 13 14 15 16 17




清容居士集  
二

開化圖書館  
Kashima Library

開化圖書

Kaithua library



**TIFFEN** Color Control Patches

© The Tiffen Company, 2007

Blue    Cyan    Green    Yellow    Red    Magenta    White    3/Color